

2 CRÓNICAS

(Norü taxre i popera i wenaxarü ãëxgacügüchigaxü ümatüxü)

Charumóü rü Tupanana
naxcax naca i cuax

1 ¹Rü Charumóü ga Dabí nane, rü wüxi ga poracü ga ãëxgacü nixí, yerü Cori ya Tupana nüxü narüngüxëë, rü yemacax natachiga. ²Rü yexguma ga nüma ga Charumóü rü naxcax nangema ga guxüma ga Iraéanecüãxgüarü ãëxgacügü ga churaragüerugü, rü íanegüarü ãëxgacügü, rü chacherdótegüarü ãëxgacügü, rü papágü ga ãëxgacü ixígüxü ga Iraéanewa. ³Rü yexguma marü yema duüxügü ga yexma ngutaquexexümaxä yadexaguwenä ga Charumóü, rü Gabaóüwa namaxä naxü yerü yéma nixí ga nayexmaxü ga guma Tupanapata ga naxchirunaxcax ga nüxcüma norü duü ga Moiché chianexügu naxüxüne. ⁴Rü marü tama Gabaóüwa nayexma ga yema baú ga Tupanaarü mugü nagu nuxü, yerü nüma ga Dabí rü üpaacü marü Quiriá-Yearíüwa nayayaxu rü Yerucharéüwa nanange nawa ga guma ípata ga naxchirunaxcax ga yema

baúcax yexma naxüxüne. ⁵Natürü Gabaóüwatama nayexma ga yema ãmarearü guchicaxü ga bróüchenaxcax ga naxüxü ga Becharé ga Uri nane ga Úrtaxa ixícü. Rü yema ãmarearü guchicaxü rü Cori ya Tupanapatapexewa nayexma ga Gabaóüwa. Rü nüma ga Charumóü rü guxüma ga yema duüxügü ga íyaxümücügüxü rü yéma Gabaóüwa naxí nax Tupanamaxä yanadexagüxücax. ⁶Rü nüma ga Charumóü rü nagu nachinagü ga yema ãmarearü guchicaxü ga bróüchenaxcax ga Tupanapatapexewa yexmaxü. Rü yemawa ínanagu ga 1,000 ga ãmaregü ga naxünagü ga Tupanacax daxü. ⁷Rü yematama chütaxügu, rü nüma ga Tupana rü Charumóücax nangox rü ñanagürü nüxü: —iChoxna naxcax naca i taxacü i cunaxwaxexü! Rü choma rü tá cuxna chanaxä —ñanagürü. ⁸Rü nüma ga Charumóü rü Tupanaxü nangäxüga rü ñanagürü: —Cumax, Pa Tupanax, rü poraacü chaunatü ga Dabí cuxü nangechaütümüxü. Rü ñuxma rü

chaunatüchicüxü ãëxgacüxü choxü quingucuchixëxë. ⁹Rü ñuxmax, Pa Cori Pa Tupanax iëcü yanguxëxë ga yema chaunatü ga Dabímaxã nüxü quixuxü rü tá nüxü curüngüxëë i nanegü rü nataagü! Erü ñuxma rü marü ãëxgacüxü choxü cuxuneta natanüwa i ngëma muxüchixü i curü duüxügü i ñoma naxnecütëxerüxü imuxü. ¹⁰Rü ëcü choxna naxã i cuax nax guxüxüma chacuáxüçax rü ngëmaäcü mea namaxã ichacuáxüçax i ngëma curü duüxügü! ¿Erü texë tüxü natauxcha nax namaxã itacuáxü i ñaa curü duüxügü i muxüchixü? —ñanagürü. ¹¹Rü nüma ga Tupana rü Charumóüxü nangãxü rü ñanagürü: —Ñuxma nax chauxütawa naxçax ícuçaxaxü i cuax nax mea chorü duüxügümaxã icucuáxüçax rü chataãxë, erü tama naxçax ícuca nax cumuarü ngëmaxüáxü rüçxna cuxü chatachigaxëëxü, rü tama naxçax ícuca nax chanadaixüçax i curü uanügü rü tama naxçax ícuca nax cumáarü maxüáxüçax. Natürü ngëma naxçax ícuçaxaxü nixí i cuax rü cuäëxü nax cucuáxü nax ngëmaäcü mea namaxã icucuáxüçax i chorü duüxügü i naxçax ãëxgacüxü cuxü chingucuchixëëxü. ¹²Rü ñuxma rü cuxna chanaxã i cuax nax guxüxüma cucuáxüçax. Natürü naëtü cuxna chanaxã i diëru rü ngëmaxügü rü cuxü chatachigaxëxë. Rü yema nüxíraxügüxü ga ãëxgacügü rü tama cuxrüxü chanatachigaxëxë, rü ngëma cuwena ãëxgacügü ixígüxü rü taxütáma ngëxgumarüxü chanatachigaxëxë —ñanagürü ga Tupana. ¹³Rü yemawena rü nüma ga Charumóü rü natáegu nawa ga guma Tupanapata ga Gabaóüwa

yexmane. Rü Yerucharéüwa naxü rü yéma Iraéanecüaxgüarü ãëxgacü nixí.

Charumóü rü Tíruarü ãëxgacü ga Iráümaxã inaxüga

2 ¹Rü nüma ga Charumóü rü nanaxunagü nax Cori ya Tupanaaxü naxüáxü ga wüxi ga tupaucax ga taxüne. Rü yexgumarüxü ta nüxü nixu rü tá naxüáxü ga napata nax ãëxgacü yixíxü. ²Rü yemacax nüxü naxuneta ga 70,000 ga nugütaeruügü, rü 80,000 ga nutagüarü mexëcüwaruügü ga maxpúneanewa puracüexü, rü 3,600 ga naerugü ga yema puracümaxã icuaxgüxü. ³Rü yemawena ga Charumóü rü ñane ga Tíruarü ãëxgacü ga Iráüxütawa namuga rü ñanagürü: —Cuxna chaca nax choxü curüngüxëëxü yema chaunatü ga Dabíxü curüngüxëëgurüxü ga yexguma mürapewagü ga ocayiwanaxçax núma cumugügurüxü nax napata naxüxüçax —ñanagürü.

Charumóü nanaxü ga Tupanapata

3 ¹Rü nüma ga Charumóü rü inanaxügü ga maxpúne ga Moríagu nax naxüáxü ga Cori ya Tupanapata ga Yerucharéüwa. Rü guma maxpúnewa nixí ga Cori ya Tupana rü nanatü ga Dabíçax nangóxü. Rü yema nixí ga yema nachica ga guma Yebuchéutanüxü ga Orná trígu nawa púxü rü Dabí nüxü unetaxü nachicaxü ga guma Tupanapata. ²Rü yexguma marü 4 ga taunecü marü ãëxgacü yixígu ga Charumóü rü meama norü taxre ga

tauemaciariü taxre ga ngunexügu
(abrilariü 17) nixi ga inaxügüxü nax
naxüxü ga guma Tupanapata.

.....

5 Rü yexguma marü yanguxgu ga
guma Tupanapata, rü nüma ga
Charumóü rü yéma nanana ga yema
Tupanapataarü yemaxügu ga
úirunaxcax rü diêrumünaxcax ga nanatü
ga Dabí Cori ya Tupanana naxü. Rü
Tupanaarü diêrutanügu namaxã
nanguxü.

**Yema baú ga Tupanaarü mugü
nagu nuxü rü guma yexwacaxüne ga
Tupanapatawa nanangegü**

²Rü nüma ga Charumóü rü
Yerucharéügu nanangutaquexexê ga
yema Iraéanecüâx ga âëxgacütücumüwa
ügüxü, rü guxüma ga yema 12 ga
Iraétücumügiarü âëxgacügüchigü, rü
guxüma ga papágü ga natanüxüeru
ixügüxü. Rü yemaacü
nanangutaquexexê nax maxpüne ga
Chióüwa yayauxgüaxücax ga yema baú
ga Tupanaarü mugü nagu nuxü, rü
guma yexwacaxüne ga napatawa
nangegüaxücax. ³Rü yema ngunexü ga
Iraéanecüâxgü nagu naxüchigagüâxü
nax düxenügütüüwa nayexmagüxü ga
meama norü 7 ga tauemacügu (octúbre)
rü yexguma nixi ga Charumóümaxã
nangutaquexegüxü ga yema
Iraéanecüâxgiarü âëxgacügü. ⁴Rü yéma
maxpüne ga Chióüwa nangugü ga
guxüma ga yema Iraéanecüâxgiarü
âëxgacügü. Rü yema Lebítanüxügü rü
nayangegü ga yema baú ga Tupanaarü
mugü nagu nucuxü. ⁵Rü guma
yexwacaxüne ga napatawa nanangegü

ga yema baú wüxigu namaxã ga guma
nüxíraxüne ga napata ga
naxchirunaxcax rü guxüma ga norü
yemaxügu. Rü yema chacherdótegü rü
Lebítanüxügü nixi ga yéma nanaxü. ⁶Rü
nüma ga âëxgacü ga Charumóü rü
guxüma ga Iraéanecüâxgü rü yexma
nangutaquexegü napexegu ga yema baú
ga Tupanaarü mugü nagu nucuxü. Rü
yema nax namuxüchixü ga yema
carnérugü, rü wocaxacügü i yatüxü ga
Tupanaçax dajüxü rü taxucüriwa texé
tayaxugü. ⁷Rü yemawena ga yema
chacherdótegü rü guma Tupanapataarü
aixepewa nanangegü ga yema baú ga
Tupanaarü mugü nagu nucuxü. Rü
yema Nachica i Üünexügu nayaxügü
natüügu ga guma naxpexátü ga yema
taxre ga daxücüâxchicünaxã ga
Charumóü üxü. ⁸Rü yema taxre ga
daxücüâxchicünaxãgü rü guma
naxpexátügü rü baú íxüxüétüguama
narüxunü rü nayadüxétügü ga yema baú
rü guma naxpawerugü. ⁹Natürü guma
naxpawerugü rü nimax, rü yemaçax
yema napexegü rü nüxü tadauama ga
yexguma nüxíraxüxü ga nachiawa
idawenügu, natürü yema norü îäxwa rü
tama nüxü tadau.

.....

¹³Rü yema wiyaetanüxü rü
paxetatanüxü rü wüxigu nawiyaegü rü
Tupanaxü nicuaxüxügü rü Cori ya
Tupanana moxê naxägü. Rü yemaacü
napaxetagü namaxã ga norü cornétagü
rü norü platfyugü rü togü ga
paxetarüügü. Rü yexguma
ínawiyaegüyane rü ñanagürügü: “iNüxü
picuaxüxügü ya Cori ya Tupana erü
nüma rü namecüma rü ngêma norü

ngechaŭ rü taguma inayagux!”
ñanagürügü. Rü yexgumatama ga guma
Cori ya Tupanapata rü caxixũmaxã
nanapá. ¹⁴Rü yema caxixũgagu rü nũma
ga chacherdótegü rü taxucürüwama
yexma narũcho nax yadaxẽẽgũaxũcax
ga yema puracü ga yéma Tupanacax
ínaxügüxũ. Yerü Tupanaarü üünemaxã
nanapá ga guma napata.

**Charumóũ rü Tupanamẽxẽgu nanaxú ga
guma ípata ga naxüxũne**

6 ¹Rü yexguma ga Charumóũ rü
nayumüxẽ rü ñanagürü: “Cumax,
Pa Cori Pa Tupanax, rü cugü quixu nax
caixanexũ i waemaxũwa cumaxũxũ.
²Natürü choma rü cuxcax chanaxü ya
daa ípata nax yimawa
cungexmaechaxũcax”, ñanagürü. ³Rü
ñuxũchi nũma ga ãẽxgacü ga Charumóũ
rü naxcax nadauegu ga guxũma ga
yema Iraéanecüãxgü ga yexma chigũxũ.
Rü mexũ namaxã naxuegu rü ñanagürü:
⁴—Namecũmaxũchi ya Cori ya tórü
Tupana. Rü nũma rü marü nayanguxẽxẽ
ga yema chaunatu ga Dabímaxã nüxũ
yaxuxũ ga yexguma ñaxgu nüxũ: ⁵“Rü
yematama ngunexũ ga Equítuanewa
chorü duũxũgü ga Iraétanüxũ
íchanguxũẽẽxũgumama rü taguma
nüxũ chaxuneta ga wüxi ga íane nax
yimagu naxüxũcax ga chopata. Rü
taguma natanüwa nüxũ chaxuneta ga
wüxi ga yatü nax chorü duũxũgü i
Iraétanüxũgũmaxã inacuáxũcax.
⁶Natürü i ñuxma rü nüxũ chaxuneta ya
Yerucharéü nax ngẽxma naxüxũcax ya
chopata. Rü nüxũ chaxuneta ya Dabí
nax yimá chorü duũxũgüarü ãẽxgacü
ixĩxũcax”, ñanagürü ga Tupana. ⁷Rü

nũma ga guma chaunatu ga Dabí rü
nüxũ nangúchaũ ga nax naxüãxũ ga
wüxi ga ípata ya taxũne naxcax ya Cori
ya tórü Tupana. ⁸Natürü nũma ga Cori
ya Tupana rü ñanagürü nüxũ: “Wüxi i
mexũ nixĩ nax nagu curüxĩnũxũ nax
chaxcax cunaxüxũ ya wüxi ya chopata.
⁹Natürü taxütáma cuma nixĩ i
cunaxüxũ. Rü yimá cune ya tá cuxũ
ngẽxmacü tá nixĩ ya naxücü ya yima
chopata”, ñanagürü ga Tupana. ¹⁰Rü
yexguma ga nũma ga Charumóũ rü
duũxũgũxũ ñanagürü: —Nũma ya Cori
ya Tupana rü marü nayanguxẽxẽ ga
yema norü uneta. Erü ñuxma i choma
rü ãẽxgacü chixĩ tümachicüxü ya chorü
papá. Rü chanaxü ya yima ípata ya
taxũne naxcax ya Cori ya tórü Tupana.
¹¹Rü ñuxma rü yimagu chayaxücuchi i
ngẽma baú i nawa nangexmagüxũ i Cori
ya Tupanaarü mugü ga nutagu ümatüxũ
ga nüxcũmaxũgũxũ ga tórü oxigũmaxã
nüxũ yaxuxũ —ñanagürü. ¹²⁻¹³Rü nũma
ga Charumóũ rü duũxũgũxũ nanaxüxẽxẽ
ga wüxi ga chinagüchica ga
bróuchenaxcax. Rü meama
Tupanapataarü ngãxũãxtügu nüxũ
nanaxüxẽxẽ napexegu ga ãmarearü
guchicaxũ. Rü yima chinagüchica rü
nüxũ nayexma ga 2 métru 70 ga norü
max, rü taxre ga métru ga norü
tatachinü, rü wüxi ga métru 57 ga norü
máchane. Rü yemagu nachinagüãcũma
rü guxũma ga Iraéanecüãxgü ga yexma
ngutaquẽxegũxũmaxã nidexa. Rü
yexguma duũxũgü nüxũ írũdaunüyane
rü nũma ga Charumóũ inacaxápüxü, rü
daxü naxunagüchacüxü rü ñaãcü
nayumüxẽ: ¹⁴“Pa Cori Pa Torü Tupanax,
rü woo i daxüguxũ i naanewa, rü woo i

ñoma i naanewa, rü nataxuma i taxacü i cuxruxü ixixü. Erü cumax rü cuyanguxëxë i curü unetagü rü aixcúma nüxü cunawex nax namaxã cumecúmaxü i ngëma curü duñxügü i norü ngúchaümaxã cuga ññuxü. ¹⁵Rü cuma rü cuyanguxëxë ga curü uneta ga chaunatü ga Dabímaxã nüxü quixuxü ga daa cupatachiga. Rü ñuxma rü aixcúmaxüchima cunangoxëxë i ngëma.

¹⁶Rü ñuxmax, Pa Torü Tupanax, rü ngëxgumarüxü ta yanguxëxë ga yema uneta ga chaunatü ga curü duñ ga Dabímaxã nüxü quixuxü ga yexguma ñacuxgu nüxü: 'Rü cutaagü tá nixí i guxügutáma ãëxgacügü ixigüxü i Iraétaniüwa ega cuxruxü mea nagu namaxëgu i chorü mugü', ñacuxgu! ¹⁷Rü ngëmacax, Pa Cori Pa Torü Tupanax, cuxü chacaxü nax cuyanguxëxëcax i ngëma curü uneta ga chaunatü ga curü duñ ga Dabímaxã nüxü quixuxü", ñanagürü.

.....

7 ¹⁻²Rü yexguma Charumóü nüxü rüchaxugü nax nayumüxëxü rü daxüguxü ga naanewa narüngu ga üxüema rü yema ãmaregü ga Tupanacax yéma nanaxü rü yema naxünagü ga Tupanacax nadaixüétügu nangu rü nixae. Rü yema Tupanaarü üüne rü guma Tupanapata namaxã nanapá rü yemacax ga yema chacherdótegü rü taxucürüwama nagu nachocu. ³Rü yexguma yema Iraéanecüãxgü yema üxüemaxü rü Tupanaarü üünexü nadaugügu nax ñuxácü Tupanapataétügu ínaxixü, rü guxüma ga nümagü rü yema ínachauãxtüügu nacaxápüxügü rü

nanangücuchitanü. Rü Tupanaxü nicuaxüxügü rü nüxna moxë naxägü rü ñanagürügü: —Nüma ya Tupana rü namecúma rü norü ngechaü rü taguma inayagux — ñanagürügü. ⁴Rü yemawena rü nüma ga ãëxgacü ga Charumóü rü guxüma ga yema togü ga Iraéanecüãxgü rü Tupanacax nanadai rü nayagu ga muxüma ga naxünagü.

.....

Tupana rü Charumóümaxã inaxuneta

¹¹⁻¹²Rü yexguma Charumóü yanguxëëgu ga guma Tupanapata rü guma ãëxgacüpata rü guxüma ga yema togü ga yemaxügü ga naxüxü, rü nüma ga Cori ya Tupana rü wüxi ga chütacü naxcax nangox rü ñanagürü nüxü: —Marü nüxü chaxínü i ngëma curü yumüxë rü marü nüxü chaxuneta ya daa chopata nax yimagu chauxcax penadaixücax rü ípenaguxücax i ngëma naxünagü i choxna pexãmaregüxü.

¹³⁻¹⁴Rü ngëmacax i ngëxguma íchayachaxächixëëgu ya pucü nax taguma napuxücax rü munügü íchangugüxëëgu nax penetügü nangóxücax rüxna pexcax daxaweane íchanguxëëgu, natürü ngëxguma chopexegu pegü íperüxíragügu i pemax nax chorü duñxügü pixigüxü, rü peyumüxëëgu rü chauxcax pedaugügu, rü nüxü perüxoegu i ngëma chixexü i pecümagü, rü choma rü tá pexü chaxínü i yéa daxüguxü i naanewa íchangexmaxüwa. Rü tá pexü nüxü icharüngüma i perü chixexügü rü tá ichayanaxoxëxë i ngëma guxchaxü i perü naanewa ngëxmaxü. ¹⁵Rü ñuxmacürüwa rü mea tá pexü nüxü

chaxínü i perü yumüxëgü i daa chopatawa pexüxü. ¹⁶Erü chomatama nüxü chaxuneta rü chanaxüünexëxë ya daa chopata nax nawa tá guxüguma changexmaxü. Rü guxüguma chauäëwa nangexma rü tá nüxna chadau. ¹⁷⁻¹⁸Rü ñuxma i cumax, Pa Charumóüx, rü ngëxguma tá cunatü ya Dabírüxü mea chauga cuxínügu, rü nagu cumaxügu i ngëma chorü mugü rü chorü ucuxëgü, rü choma rü tá chayanguxëxë ga yema uneta ga cunatü ga Dabímaxã nüxü chixuxü nax cumax rü cutaagü rü guxügutáma Iraéanecüäxgüarü äëxgacügü tá yixígüxü. ¹⁹⁻²⁰Natürü ngëxguma pema rü choxna pixígachitanügu rü tama peyanguxëëgu i ngëma mugü ga pexna chaxäxü rü naxchicünaxägüxümare picuaxüüügügu, rü tá nawa pexü íchawoxü i ñaa naane i pexna chaxäxü. Rü tá nüxna chixügachi ya daa chopata ya chaxüünexëëchiréne, rü tá wüxi i cugüruxü chayaxíxëxë napëxewa i ngëma togü i nachixüanegü. ²¹Rü daa chopata ya mexechichiréne rü nachicaxica tá ngëma nayaxü. Rü ngëxguma i guxüma i duüxü i nawa üpetüxü i ñaa nachica rü nüxü nadaugügu i ngëma chopatachica rü tá namaxã nabäixächie rü tá ñanagürügü: “¿Tüxcüü ya Cori ya Tupana i poraäcü nachixexëäxü i ñaa nachixüane rü daa napata?” ñanagürügü tá. ²²Rü namücügü rü tá nanangäxügu rü ñanagürügü tá: “Ngëmaäcü namaxã nangupetü erü ñaa duüxügü rü nüxna nixígachi ya Cori ya norü oxigüarü Tupana ga Equítuanewa ínguxüxëëcü, rü nawe narüxi ga yema naxchicünaxägümare rü nüxü

nicuaxüxügü. Rü yemacax nixí ga Tupana ga naxcax ínguxëëgüäxü ga yema taxü ga guxchaxügü”, ñanagürügü tá —ñanagürü ga Tupana nüxü ga Charumóü.

.....

Yerucharéüwa äëxgacü nixí ga Chedequía

36 ¹¹Rü nüma ga Chedequía rü nüxü nayexma ga 21 ga norü taunecü ga yexguma noxri äëxgacü yixíxgu. Rü 11 ga taunecü nixí ga äëxgacü yixíxü ga Yerucharéüwa. ¹²Natürü wüxi ga äëxgacü ga tama Tupanaga ínücü nixí. Yerü tama inarüxínüchaü nüxü ga guma orearü uruxü ga Yeremía ga Tupana nawa namaxã idexacü. ¹³Rü naétü tama nayanguxëxë ga norü uneta ga Tupanapëxewa Babiróniaanearü äëxgacü ga Nabucudonochómaxã nüxü yaxuxü nax norü churaragümaxã tá nüxü nangüxëëxü. Rü nüma ga Chedequía rü poraäcü nügü nataixëxë nax tama Tupanaga naxínüxcax. ¹⁴Rü yexgumarüxü ta ga guxüma ga Yudadanecüäxarü äëxgacügü rü norü duüxügü rü chacherdótegü rü ta, rü poraäcü chixri namaxë. Rü to ga nachixüane ga tama Tupanaxü cuaxgüxüarü tupanachicünaxäxü nicuaxüxügü. Rü yemaacü chixexü nawa naxügü ga guma Tupanapata ga nüma ga Tupana nüxü unetane nax napata yixíxcax ga Yerucharéüwa. ¹⁵Rü nüma ga Cori ga Iraéanecüäxgüarü oxigüarü Tupana rü guxüguma yéma nanamugü ga norü orearü uruügü nax yaxucuxëgüaxüxcax, yerü nüma ga Tupana rü nüxü nangechaütümüxügü

ga norü duũxũgü rü nüxũ nangechaũ ga guma napata ga nawa nayexmane.

¹⁶Natürü nümagü ga yema duũxũgü rü nüxũ nacugüeama ga yema Tupanaarü orearü uruũgü rü tama nüxũ inarüxĩnuechaũ ga yema namaxã nüxũ yaxuxũ. Rü yemaçax ga nüma ga Tupana rü düxwa namaxã nanu ga yema norü duũxũgü rü taxúema Tupanaxũ ítayachaxächixëxë.

Nagu narüchixe ga Tupanapata rü inawoxũ ga Yudáanecüãxgü

¹⁷Rü yemaçax nüma ga Cori ya Tupana rü Cadéguäarü ãëxgacüxũ namu nax nadaiaxũçax ga yema Iraéanecüãxgüarü ngextjüxüxũgü ga Tupanapatawa puracüexũ. Rü tama nüxũ tangechaũtümüxũgü ga guxema ngextjüxügüxe, rü paxegü, rü yaxguãxgü, rü guxema ichixéxe. Rü yemaacü ga nüma ga Cori ya Tupana rü guxũma ga Iraéanecüãxgüxũ Cadéguümexëgu nayixëxë nax nadaiaxũçax. ¹⁸Rü guxũma ga Tupanapataarü yemaxũgü ga itaxũ rü ixíraxũ rü nayana. Rü norü diërugü ga guma Tupanapata, rü guma ãëxgacüpataarü diërugü rü yema norü ngũxëëruũgüarü diërugü, rü nüma ga Cadéguäarü ãëxgacü rü íane ga Babiróniawa nanana. ¹⁹Rü guma Tupanapata rü nayagugü rü yema Yerucharéüarü poxeguxũ rü nagu napogüe. Rü guma ãëxgacüpatagü ínanagu rü inayanaxoxëëgü ga guxũma ga taxacü ga tatanüxũ ga guma íanewa yexmaxũ. ²⁰Rü yemawena rü yema Iraéanecüãxgü ga íyaxüxũ rü Babiróniaanewa nanagagü nax ãëxgacüarü rü nanegüarü puracütanüxũ

yixjüxũçax. Rü yemaacü nixjü rü ñuxmata Pérchiaanearü ãëxgacüümexëwa nayexmagü ga Cadéguü. ²¹Rü yemaacü nixí ga yanguxũ ga yema Tupanaarü ore ga Yeremíawa nüxũ yaxuxũ ga ñaxgu: “Rü ngëma naane rü tá inarüngü”, ñaxgu. Rü aixcuma yemaacü nangupetü yerü yema 70 ga taunecü ga Cadéguümexëwa nax nayexmaxũ rü inarüngü ga yema Iraéane yerü nataxuma ga duũxũgü ga nawa puracüexũ.

Pérchiaarü ãëxgacü ga Chíru nanaxunagü nax wena naxüaxũ ga Tupanapata

²²Rü guma taunecü ga nagu yangucuchicü ga Chíru nax Pérchiaanearü ãëxgacü yixjüxũçax, rü nüma ga Tupana rü Chírüãëwa nananguxëxë ga ínü nax naxunagüaxũçax ga wüxi ga mu ga Iraéanecüãxgüétiwa idexaxũ nax nüxũ nangüxëëgüxũçax. Rü nanaxümatü ga yema mu rü guxũ ga norü naanewa nanamu nax yemaacü yanguxũçax ga Cori ya Tupanaarü ore ga Yeremíawa nüxũ yaxuxũ. ²³Rü nüma ga Chíru ga Pérchiaanearü ãëxgacü rü nanaxunagü i ñaa ore ga ñaxũ: “Rü nüma ya Cori ya daxüguxũ i naanearü Tupana, rü choxmexwa nanangexmagüxëxë i guxũma i ãëxgacügü i ñoma i naanewa ngëxmagüxũ. Rü choxũ namu nax Yerucharéügu chanaxüxũçax ya napata i Yudáanewa. Rü ngëmacax ya ngexerüxüxe i pemax nax Cori ya Tupanaarü duũxũgü pixjüxũ irü ëcü pechixüanecax pewoegu! iRü nüma ya Cori ya perü Tupana pexü rüngüxëxë!” ñanagü rü ga ãëxgacü ga Chíru.